

Seminar keusahawanan, bioteknologi tingkatkan pengeluaran orkid

SERDANG (29 Sept) – Malaysia mempunyai satu kelebihan iaitu iklim yang sesuai untuk ditanam dengan pelbagai jenis orkid sama ada hybrid tempatan ataupun asing dalam bentuk ladang yang luas.

Melihat kepada perkembangan ini, Hexagon Green Sdn. Bhd bersama Fakulti Pertanian, Universiti Putra Malaysia dan International Society for Southeast Asian Agricultural Science (ISSAAS) menganjurkan seminar Bioteknologi dalam pengeluaran orkid secara komersial.

Seminar ini adalah khusus bagi melahirkan usahawan dan pengusaha tanaman orkid secara komersial. Ia melibatkan beberapa elemen penting termasuk keusahawanan dan pengurusan perniagaan ladang.

Seminar yang julung kali diadakan ini bertujuan untuk mempromosi dan mendedahkan bioteknologi terkini bagi pengeluaran orkid menggunakan teknik kultur tisu serta memperkenalkan kepada usahawan tempatan perniagaan bunga orkid secara komersial.

Seminar ini juga merangkumi pembentangan kertas kerja meliputi aspek bioteknologi, kultur tisu, pengalaman peladang komersial, pemasaran, pembangunan usahawan, peluang dan khidmat kewangan dan program usahawan tani.

Ia dirasmikan oleh Menteri Pembangunan Usahawan dan Koperasi, Dato' Mohamed Khaled Nordin. Turut hadir ialah Naib Canselor UPM, Prof Dr Mohd. Zohadie Bardaie, Pengarah Hexagon Green, Dr Md Yusof Husin, dan Dekan Fakulti Pertanian, Prof. Dr. Mohd. Khanif Yusop.

Khaled yang buat pertama kalinya menghadiri majlis yang berkaitan secara langsung dengan keusahawanan pertanian menyatakan keyakinannya dalam kemajuan industri bunga orkid.

Katanya, jika negara kita bersungguh-sungguh dalam industri ini (bunga orkid) iaitu dalam bentuk perladangan kita boleh mengeluarkan dan mengeksport 10 kali ganda bunga orkid dalam masa yang singkat jika bermula dari sekarang.

"Kementerian saya juga sedang berusaha untuk melahirkan seberapa banyak program inkubator secara lebih strategik kerana mempunyai kelebihan dari segi pakej perkhidmatan sama ada program, latihan, bantuan dan pembiayaan kerana sokongan yang dapat kita tawarkan daripada agensi-agensi di bawah kita termasuklah koperasi dan juga bank-bank," ujar beliau dalam ucapannya.

Pada masa yang sama, seminar ini juga mendapat sambutan yang hangat dari pelbagai pihak baik individu mahupun agensi kerajaan dan swasta termasuk dari Sarawak, Labuan dan Sabah.

Menurut Yusof Husin seminar ini adalah langkah pertama dalam misi syarikatnya untuk menubuhkan jaringan pembekal dan nurseri anak benih orkid yang terpilih dan bermutu tinggi.